

## I. DISPOSICIÓN XERAIS

### MINISTERIO DE INCLUSIÓN, SEGURIDADE SOCIAL E MIGRACIÓNS

**4690** Orde ISM/371/2020, do 24 de abril, pola que se desenvolve o artigo 34 do Real decreto lei 11/2020, do 31 de marzo, polo que se adoptan medidas urxentes complementarias no ámbito social e económico para facer fronte ao COVID-19.

O artigo 34 do Real decreto lei 11/2020, do 31 de marzo, polo que se adoptan medidas urxentes complementarias no ámbito social e económico para facer fronte ao COVID-19, permite que as empresas e os traballadores por conta propia incluídos en calquera réxime da seguridade social cuxa actividade non se encontre suspendida con ocasión do estado de alarma declarado polo Real decreto 463/2020, do 14 de marzo, poidan solicitar á Tesouraría Xeral da Seguridade Social unha moratoria de seis meses, sen xuros, no pagamento das achegas empresariais á cotización á seguridade social e por conceptos de recadación conxunta cuxo período de devindicación estea comprendido entre os meses de abril e xuño de 2020, así como no pagamento das cotas dos traballadores por conta propia cuxo período de devindicación estea comprendido entre os meses de maio e xullo de 2020.

O dito artigo 34 contén as normas de procedemento aplicables á tramitación da referida moratoria e unicamente remite aos requisitos e condicións para poder beneficiarse da medida que se estableza mediante orde do ministro de Inclusión, Seguridade Social e Migracións, logo de acordo da Comisión Delegada do Goberno para Asuntos Económicos.

De acordo con isto e co obxecto de asegurar a efectiva aplicación desa moratoria, dítase a presente orde ministerial, na cal se determinan as actividades económicas que poderán acollerse a ela, de acordo coa vixente Clasificación nacional de actividades económicas (CNAE-2009).

Esta orde adecúase aos principios de boa regulación establecidos no artigo 129 da Lei 39/2015, do 1 de outubro, do procedemento administrativo común das administracións públicas.

Así, é respectuosa cos principios de necesidade, eficacia e proporcionalidade, posto que a súa regulación resulta xustificada e o seu alcance é o imprescindible para a consecución do obxectivo perseguido, que non é outro que ditar as normas necesarias para poder asegurar a efectiva aplicación da moratoria prevista no artigo 34 do Real decreto lei 11/2020, do 31 de marzo.

En cumprimento do principio de seguridade xurídica, a regulación desta orde resulta coherente co resto do ordenamento xurídico, nacional e da Unión Europea, e xera un marco normativo estable, predicible, integrado, claro e de certeza, que facilite o seu coñecemento e comprensión.

En aplicación do principio de transparencia, o obxectivo da orde defínese e xustifícase neste preámbulo, e en cumprimento do principio de eficiencia, a súa regulación non supón a imposición de ningún tipo de obrigação ou carga administrativa para empresas e traballadores nin ningunha utilización de recursos públicos.

A presente orde adecúase plenamente á orde constitucional de distribución de competencias, en concreto á competencia exclusiva atribuída ao Estado en materia de réxime económico da seguridade social polo artigo 149.1.17.<sup>a</sup> da Constitución española.

Esta orde dítase en uso da habilitación conferida no artigo 34.1 do Real decreto lei 11/2020, do 31 de marzo, en que se dispón que mediante orde do ministro de Inclusión, Seguridade Social e Migracións se establecerán os requisitos e condicións para poder beneficiarse da moratoria no pagamento de cotas nel regulada.

Na súa virtude, logo de acordo da Comisión Delegada do Goberno para Asuntos Económicos e de acordo co Consello de Estado, dispoño:

Artigo único. *Actividades económicas que poderán acollerse á moratoria no pagamento de cotizacións sociais prevista no artigo 34 do Real decreto lei 11/2020, do 31 de marzo, polo que se adoptan medidas urxentes complementarias no ámbito social e económico para facer fronte ao COVID-19.*

A moratoria no pagamento de cotizacións sociais prevista no artigo 34 do Real decreto lei 11/2020, do 31 de marzo, polo que se adoptan medidas urxentes complementarias no ámbito social e económico para facer fronte ao COVID-19, resultará de aplicación ás empresas e aos traballadores por conta propia cuxa actividade económica, entre aquelas que non se encontren suspendidas con ocasión do estado de alarma declarado polo Real decreto 463/2020, do 14 de marzo, esta incluída nos seguintes códigos da Clasificación nacional de actividades económicas (CNAE-2009):

- 119 (Outros cultivos non perennes).
- 129 (Outros cultivos perennes).
- 1812 (Outras actividades de impresión e artes gráficas).
- 2512 (Fabricación de carpintería metálica).
- 4322 (Fontanaría, instalacións de sistemas de calefacción e aire acondicionado).
- 4332 (Instalación de carpintería).
- 4711 (Comercio ao retallo en establecementos non especializados, con predominio en produtos alimenticios, bebidas e tabaco).
- 4719 (Outro comercio ao retallo en establecementos non especializados).
- 4724 (Comercio ao retallo de pan e produtos de panadaría, confeitaría e pastelería en establecementos especializados).
- 7311 (Axencias de publicidade).
- 8623 (Actividades odontolóxicas).
- 9602 (Peiteado e outros tratamentos de beleza).

Disposición derradeira primeira. *Título competencial.*

Esta orde dítase ao abeiro do disposto no artigo 149.1.17.<sup>a</sup> da Constitución española, que atribúe ao Estado a competencia exclusiva en materia de réxime económico da seguridade social.

Disposición derradeira segunda. *Entrada en vigor.*

A presente orde entrará en vigor o día da súa publicación no «Boletín Oficial del Estado».

Madrid, 24 de abril de 2020.– O ministro de Inclusión, Seguridade Social e Migracións, José Luis Escrivá Belmonte.